

27 OCT 2001

Mahathir-ICJ

SEMUA PIHAK KENA TERIMA KEPUTUSAN ICJ KATA MAHATHIR

KUALA LUMPUR, 27 Okt (Bernama) -- Semua pihak perlu menerima keputusan yang dibuat oleh Mahkamah Keadilan Antarabangsa (ICJ) mengenai isu tuntutan bertindih antara Malaysia dengan Indonesia berhubung pemilikan Pulau Sipadan dan Ligitan di Sabah, kata Perdana Menteri Datuk Seri Dr Mahathir Mohamad.

"Kita bersetuju untuk rujuk kepada Mahkamah Keadilan Antarabangsa .. kita kena terimalah keputusan mahkamah, walaupun kadang-kadang keputusan itu tidak menyenangkan kita," kata Perdana Menteri pada sidang media di Pangkalan Tentera Udara Diraja Malaysia, Subang sekembalinya dari lawatan ke Korea Selatan.

Dr Mahathir diminta mengulas tindakan Filipina yang masih tidak berpuas-hati terhadap keputusan ICJ yang menolak permohonan Manila untuk mencelah dalam isu tuntutan itu.

Beliau berkata kerajaan akan menerima sebarang keputusan yang dibuat oleh ICJ mengenai isu itu sungguhpun ianya tidak memihak kepada Malaysia.

Dr Mahathir menyebut tentang pengalaman lalu apabila kerajaan akur dengan keputusan mahkamah sungguhpun ianya tidak memihak kepada kerajaan dengan menyebut contoh keputusan mahkamah mengharamkan Umno pada satu ketika dahulu.

"Seperti di mahkamah lain, kita biasa menerima keputusan yang merugikan kita.. umpamanya keputusan mengharamkan Umno," katanya.

Dr Mahathir berkata sungguhpun ada pihak yang merasakan keputusan ICJ itu tidak kena, namun semua pihak harus menerimanya.

Pada Jumaat, penolong setiausaha luar Filipina, Merlin Magallona berkata keputusan ICJ itu telah menafikan proses undang-undang yang sewajarnya bagi Filipina.

Magallona juga menegaskan keputusan ICJ itu tidak sedikitpun menjejaskan kewajaran tuntutan Manila terhadap Sabah.

-- BERNAMA

AKT AKT PR